

Na osnovu čl. 4.2 i 4.8, Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), i čl. 30. i 31. Metodologije za izradu tarifa za usluge distribucije električne energije u Brčko Distriktu Bosne i Hercegovine ("Službeni glasnik BiH", broj 89/11), rješavajući po zahtjevu javnog preduzeća za komunalne djelatnosti "Komunalno Brčko" d.o.o., Brčko Distrikt BiH, broj: 02.01-16685/11 od 4. novembra 2011. godine, na sjednici Državne regulatorne komisije za električnu energiju održanoj 22. decembra 2011. godine, donijeta je

ODLUKA

O TARIFNIM STAVOVIMA ZA NEKVALIFICIRANE KUPCE ELEKTRIČNE ENERGIJE IZ KATEGORIJE DOMAĆINSTVA U BRČKO DISTRIKTU BOSNE I HERCEGOVINE

Član 1. (Predmet)

Ovom odlukom utvrđuju se cijene električne energije, izražene kroz tarifne stavove, koji služe za obračun i naplatu električne energije od nekvalificiranih kupaca električne energije iz kategorije domaćinstva u Brčko Distriktu Bosne i Hercegovine.

Član 2. (Tarifni stavovi)

Tarifni stavovi za isporučenu električnu energiju za nekvalificirane kupce iz kategorije domaćinstva u Brčko Distriktu Bosne i Hercegovine su sljedeći:

| OPIS | | | Tarifni stavovi za nekvalificirane kupce električne energije iz kategorije domaćinstva | | | | | |
|-------------------------------------|-------------|------------|--|-------------|-----------------------------|-------------|--|-------------|
| | | | Obračunska snaga | | Aktivna električna energija | | Prekomjerno preuzeta reaktivna električna energija | |
| Kategorije potrošnje i grupe kupaca | | Jed. mjere | KM/kW/mjesec | | fening/kWh | | fening/kVArh | |
| Naziv kategorije | Naziv grupe | Sezona | VS (zima) | NS (ljetno) | VS (zima) | NS (ljetno) | VS (zima) | NS (ljetno) |
| | | Doba dana | | | | | | |
| 0,4 kV - domaćinstva | 1 TG | ST | 1,95 | 1,50 | 11,25 | 8,66 | | |
| | 2 TG | VT | 1,95 | 1,50 | 13,76 | 10,58 | | |
| | | MT | | | 6,88 | 5,29 | | |

Navedeni tarifni stavovi ne sadrže iznos poreza na dodatu vrijednost.

Član 3. (Obračunska snaga)

Obračunska snaga iznosi 5 kW za tarifne grupe kupaca iz kategorije domaćinstva kod kojih se obračunska snaga ne utvrđuje mjerenjem.

Član 4. (Tarifni stavovi prema sezonama i dobu dana)

(1) Tarifni stavovi za aktivnu energiju primjenjuju se prema sezoni, i to:

- a) u višoj sezoni (VS) od 1. oktobra do 31. marta,
 - b) u nižoj sezoni (NS) od 1. aprila do 30. septembra.
- (2) Tarifni stavovi za aktivnu energiju primjenjuju se prema dobu dana, i to:
- a) veći dnevni tarifni stavovi (VT) od 7 do 13 sati i od 16 do 22 sata tokom zimskog računanja vremena, odnosno od 8 do 14 sati i od 17 do 23 sata tokom ljetnog računanja vremena,
 - b) manji dnevni tarifni stavovi (MT) od 13 do 16 sati i od 22 do 7 sati tokom zimskog računanja vremena, odnosno od 14 do 17 sati i od 23 do 8 sati tokom ljetnog računanja vremena, te nedjeljom.

Član 5.

(Obaveza objave tarifnih stavova)

Javno preduzeće za komunalne djelatnosti “Komunalno Brčko” d.o.o., Brčko Distrikt BiH, kao korisnik privremene licence za obavljanje djelatnosti distribucije i snabdijevanja električnom energijom, dužno je na odgovarajući način objaviti tarifne stavove i relevantne odredbe ove odluke, te ih učiniti dostupnim svim kupcima iz kategorije domaćinstva na području Brčko Distrikta BiH.

Član 6.

(Završne odredbe)

- (1) Ova odluka stupa na snagu danom donošenja, primjenjuje se od 1. januara 2012. godine i bit će objavljena u “Službenom glasniku BiH” i službenom glasilu Brčko Distrikta Bosne i Hercegovine.
- (2) Odluka sa obrazloženjem dostavit će se podnosiocu zahtjeva i objaviti na internet stranici DERK-a u roku od 30 dana od dana donošenja.

Obrazloženje

Shodno *Odluci o osnivanju javnog preduzeća “Komunalno Brčko” d.o.o., Brčko Distrikt BiH* (“Službeni glasnik BD BiH”, br. 20/07, 21/07, 24/08 i 33/09), “Komunalno Brčko” d.o.o., Brčko Distrikt BiH (u daljem tekstu: Kompanija) dužno je omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja.

U skladu sa članom 7. *Zakona o prenosu, regulatoru i operatoru sistema električne energije u Bosni i Hercegovini* (“Službeni glasnik BiH”, br. 7/02, 13/03, 76/09 i 1/11 – u daljem tekstu: *Zakon o prenosu*) i članom 107a. *Zakona o električnoj energiji* (“Službeni glasnik BD BiH”, br. 36/04, 28/07 i 61/10) za obavljanje ovih aktivnosti Kompanija je bila dužna pribaviti licencu Državne regulatorne komisije za električnu energiju (u daljem tekstu: DERK), a prema uvjetima, kriterijima i procedurama koje odredi DERK.

Kompanija je od 19. januara 2011. godine vlasnik privremene licence za obavljanje djelatnosti distribucije i snabdijevanja električnom energijom na području Brčko Distrikta BiH, registracijski broj: 05-28-12-017-2/11 izdate odlukom DERK-a (“Službeni glasnik BiH”, broj 7/11).

Tarife za usluge proizvodnje, distribucije i snabdijevanja električnom energijom u Brčko Distriktu BiH, saglasno naprijed pomenutim zakonima regulira i odobrava DERK.

U cilju nesmetanog finansiranja Kompanije, DERK je svojom odlukom broj: 04-28-5-018-5/11 od 27. januara 2011. godine odredio privremene tarifne stavove, koji

služe za obračun i naplatu električne energije od nekvalificiranih (tarifnih) kupaca električne energije u Brčko Distriktu BiH.

U nastavku aktivnosti na uspostavljanju transparentnih pravila za reguliranje elektroenergetskih djelatnosti na teritoriji Brčko Distrikta BiH, DERK je 26. oktobra 2011. godine usvojio *Metodologiju za izradu tarifa za usluge distribucije električne energije u Brčko Distriktu Bosne i Hercegovine* (“Službeni glasnik BiH”, broj 89/11 – u daljem tekstu Metodologija).

U skladu sa odredbama Metodologije, Kompanija je 4. novembra 2011. godine uputila DERK-u zahtjev za određivanje tarifa broj: 02.01-16685/11 (zaprimljen u DERK-u pod brojem: 04-28-5-334/11 dana 4. novembra 2011. godine), a tarifni postupak pokrenut je zaključkom DERK-a broj: 04-28-5-334-1/11 od 8. novembra 2011. godine.

DERK je uvažio okolnosti da je Kompaniji bilo samo djelimično moguće ispoštovati da zahtjev bude podniet na tarifnim obrascima, sa svim podacima i informacijama propisanim *Odlukom o određivanju obrazaca za dostavljanje podataka u tarifnom postupku* (“Službeni glasnik BiH”, broj 44/05).

Razmatranje zahtjeva za tarife kroz postupak odobravanja tarifa u najvećoj mogućoj mjeri mora ispoštovati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i opravdanim troškovima i određene na transparentan način.

U planu za 2012. godinu Kompanija planira količinu električne energije za potrebe snabdijevanja kupaca iz kategorije domaćinstva u Brčko Distriktu BiH u iznosu od 135 242 240 kWh.

Podaci Kompanije, za djelatnost snabdijevanja električne energije, navode slijedeće planirane troškove i rashode za 2012. godinu, ostvarenje za 2010. godinu i procjenu za 2011. godinu:

| Troškovi i rashodi (KM) | 2010 | 2011 procjena | 2012 zahtjev |
|----------------------------------|------------------|----------------------|---------------------|
| Materijalni troškovi | 117.134 | 97.270 | 102.500 |
| Troškovi usluga | 227.792 | 218.626 | 282.300 |
| Troškovi radne snage | 1.458.016 | 1.576.381 | 1.628.700 |
| Amortizacija | 106.883 | 119.988 | 131.300 |
| Nematerijalni troškovi | 195.080 | 209.510 | 222.150 |
| Ostali rashodi | 0 | 0 | 137.249 |
| Ukupno troškovi i rashodi | 2.104.905 | 2.221.775 | 2.504.199 |

Obzirom da DERK u tarifnom postupku regulira samo dio troškova djelatnosti snabdijevanja električnom energijom koji se odnosi na snabdijevanje nekvalificiranih kupaca iz kategorije domaćinstva, pristupilo se određivanju visine pripadajućeg troška snabdijevanja za ovu kategoriju kupaca električne energije.

Broj kupaca iz kategorije domaćinstva u ukupnom broju kupaca električne energije na području Brčko Distrikta BiH učestvuje približno sa 87% što je vidljivo iz podataka iz slijedeće tabele:

| Kategorija potrošnje | Prosječan broj kupaca u 2011. |
|-----------------------------|--------------------------------------|
| Kupci na 35 kV | 1 |

| | |
|----------------------------|---------------|
| Kupci na 10 kV | 22 |
| 0,4 kV Ostala potrošnja | 3.886 |
| Domaćinstva | 28.475 |
| Javna rasvjeta | 396 |
| Ukupan broj kupaca: | 32.781 |

Imajući u vidu da je trošak snabdijevanja direktno zavisano od broja kupaca električne energije jer se odnosi na poslove fakturiranja, obračuna, pripreme i izdavanja računa kupcima, naplate i sl., očigledno je da se najveći dio ovog troška odnosi na kupce iz kategorije potrošnje domaćinstva.

Obzirom da se ne planira značajan porast potrošnje električne energije na području Brčko Distrikta BiH u 2012. godini, analogno se može pretpostaviti da neće doći ni do značajnijeg povećanja broja kupaca električne energije, a time ni troška snabdijevanja u narednom periodu.

Imajući u vidu naprijed navedeno i sagledavajući situaciju po pitanju troška snabdijevanja u distributivnim preduzećima u okruženju, za pripadajući trošak snabdijevanja kupaca iz kategorije domaćinstava u Brčko Distriktu BiH Komisija odobrava iznos od 1.997.929 KM.

Trošak nabavke električne energije za kupce iz kategorije domaćinstva se bazira na prosječnoj cijeni nabavke električne energije za kategoriju potrošnje domaćinstva u Brčko Distriktu BiH koja iznosi 6,4917 feninga/kWh i planiranoj količini električne energije za 2012. godinu od 135 242 240 kWh.

Dakle, trošak nabavke električne energije u 2012. godini za kupce iz kategorije domaćinstva se utvrđuje u iznosu od 8.779.520 KM.

U skladu sa Metodologijom, djelatnost snabdijevanja kupaca električne energije koji pripadaju kategoriji domaćinstva je regulirana djelatnost koja pored troškova po osnovu tarifa za distribuciju električne energije (distributivna mrežarina), uključuje i troškove nabavke i snabdijevanja električne energije.

Ukupni troškovi snabdijevanja kupaca električne energije koji pripadaju kategoriji domaćinstva u Brčko Distriktu BiH se, prema Metodologiji, unutar kategorije potrošnje raspoređuju po tarifnim elementima i stavovima.

Uz zadržavanje prosječne krajnje cijene električne energije kupaca iz kategorije domaćinstva na postojećem nivou, a radi pravilne alokacije troškova po tarifnim elementima, izvršena je korekcija tarifnih stavova za ovu kategoriju u odnosu na važeće.

Komisija smatra da tarifni stavovi pružaju realnu osnovu Kompaniji da u 2012. godini za djelatnost snabdijevanja kupaca električne energije iz kategorije domaćinstva ostvari potreban prihod za nesmetano funkcioniranje.

U skladu sa Metodologijom, tarifni stavovi za snabdijevanje električnom energijom kupaca iz kategorije domaćinstva se određuju u prelaznom periodu do potpunog otvaranja tržišta električne energije u Bosni i Hercegovini, a najkasnije do 31. decembra 2014. godine. Ovi stavovi se određuju u cilju omogućavanja javne usluge snabdijevanja električnom energijom kupaca iz kategorije domaćinstva.

Na osnovu naprijed izloženih stanovišta Komisije, u okvirima njenih diskrecijskih prava da potvrdi reprezentativnost i opravdanost svih podnijetih podataka i tvrdnji, da procjenjuje stepen vjerovatnoće ostvarenja svih prognoziranih troškova i rashoda i da odobrava tarife uvažavajući i konkretne okolnosti u periodu podnošenja zahtjeva za odobrenje tarifa sve do

objektivizacije uvjeta za njihovo preciznije određivanje, te koristeći ovlaštenja utvrđena Zakonom o prenosu i Zakonom o električnoj energiji Brčko Distrikta BiH da uređuje i pitanja reguliranja snabdijevanja kupaca električne energije koji pripadaju kategoriji domaćinstva na području Brčko Distrikta BiH, Komisija donosi odluku kao u dispozitivu.

DERK će kontinuirano pratiti efekte primjene usvojenih tarifnih stavova zadržavajući pravo podešavanja tarifa kada ocijeni da je to potrebno.

U skladu sa članom 9.2 *Zakona o prenosu, regulatoru i operatoru sistema električne energije u Bosni i Hercegovini*, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objavljivanja ove odluke.

Broj: 04-28-5-334-18/11

Predsjedavajući Komisije

22. decembra 2011. godine

Tuzla

Nikola Pejić